



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Baucau
22 Setembru 2015

**Tribunál Distritál Baucau kondena pena prizaun tinan 7 ba arguidu kazu
abuzu seksuál ba menór**

Iha 16 Setembru 2015, Tribunál Distritál Baucau prezide leitura akordaun no kondena arguidu AdS ho pena prizaun tinan 7 tanba tribunál prova katak arguidu komete krime abuzu seksuál hasoru lezada ne'ebé sei tinan 13 resin. Kazu ne'e akontese iha 09 Agostu 2012, iha Distritu Baucau.

Tribunál prova katak arguidu no lezada hasoru malu iha merkadu, arguidu bolu no hakbesik aan ba lezada, kaer lezada nia liman no obriga lezada (maske lezada lakohi) no lori ba edifísiu ida ne'ebé arguidu servisu ba. Iha fatin ne'e, arguidu ameasa lezada ho tudik no rasta lezada ba haris fatin laran no komete violasaun seksuál hasoru lezada.

Bazeia ba faktu provadu sira ne'ebé produs durante julgamentu, tribunál kondena arguidu ho pena prizaun tinan 7 ba krime abuzu seksuál ba menór no absolve arguidu hosi akuzasaun krime sekuestru. Tribunál mós kondena arguidu selu kustu judicial US\$20.00. Tribunál la-esplika tanbasa, absolve krime sekuestru tanba iha prosesu akareasaun lezada deklara katak arguidu sulan nia durante kalan 1 la'os kalan 3 hanesan iha akuazasaun ministériu públiku.

Antes ne'e ministériu públiku akuza arguidu kontra artigu 177 Kódigu Penál kona-ba abuzu seksuál ba menór no artigu 160 Kódigu Penál kona-ba sekuestru.

“JSMP apresia tribunál sira nia komitmentu atu asegura pena ba autór sira iha kazu abuzu seksuál hasoru labarik sira. Maibé JSMP enkoraza tribunál atu avalia profundamente krime sira seluk ne'ebé iha ligasaun direta ka nu'udar parte intearal hosi ne'e nia âmbito, atu asegura sentensa ida ne'e apropriadu no justu ba lezada,” dehan Diretór Ezekutivu, JSMP, Luis de Oliveira Sampaio.

JSMP kontenti tanba tribunál kondena duni arguidu maske bazeia deit ba iha lezada nia deklarasaun tanba arguidu nega faktus katak nia la obriga no la komete violasaun seksuál hasoru lezada. Aleinde ne'e mós kazu ne'e laiha testemuña ne'ebé hare ho matan no laiha relatóriu

médiku ne'ebé prova katak arguidu komete duni krime ne'e. Maske nune'e, tribunál deside atu kondena arguidu ho pena prizaun tinan 7.

Ne'e progresu ida ne'ebé pozitivu iha setór judisiáriu, tanba dalabarak tribunál sira nunka kondena arguidu iha kazu sira hanesan ne'e kuandu bazeia deit ba lezada nia deklarasaun. Maske nune'e, tuir JSMP, desizaun ne'e ladun apropriadu tanba la atinze metade hosi pena másimu ne'ebé hatur iha artigu 177 Kódigu Penál.

Iha Artigu 177 (1) Kódigu Penál kona-ba abuzu seksuál ba menór hasoru labarik ne'ebé seidaun idade 14 sei hetan pena prizaun tinan 5 to'o 20.

Tuir JSMP kuandu, tribunál prova duni arguidu komete krime abuzu seksuál hasoru vítima ne'ebé sei idade menór, tribunal tenke fo pena ida ne'ebé pelomenus refleta metade hosi pena másimu tinan 20 prizaun.

JSMP husu atu tribunál tenki konsidera faktus sira ne'ebé iha ligasaun forte ba akontesimentu ne'e, no konsidera mós impaktu iha futuru duke konsidera barak liu sirkuntansia atenuantes ne'ebé dalaruma halo kmaan liu tiha fali impaktu ne'ebé vítima sofre.

Antes ne'e, iha alegasaun finál, ministériu públiku husu ba tribunál atu kondena arguidu ho pena ne'ebé adekuaudu tanba arguidu komete duni krime ne'e hasoru lezada ne'ebé sei menoridade.

Entertantu defeza husu atu tribunál absolve arguidu tanba tuir defeza iha momentu ne'ebá arguidu la obriga nia maibé lezada rasik tuir deit wainhira arguidu bolu no imposivel arguidu telefone ba lezada nia aman kuandu arguidu iha intensaun atu viola vítima.

JSMP fiar katak abuzu seksuál hasoru labarik fo impaktu negativu no sériu teb-tebes ba labarik sira nia moris, afeita sira nia desenvolvimentu psicolójiku no saúde fíziku. Maioria kazu hanesan ne'e sei lori presaun no trauma ba labarik sira durante sira nia vida tomak mesmu sira tama ona ba adultu ka forma ona família.

Hanesan JSMP subliña ona dalabarak katak iha kazu sira hanesan ne'e iha potencialidade boot ba labarik sira atu hili opsau ba vida ne'e la seguru iha futuru. Ne'e tanba trauma ne'ebé sira sofre hosi krime ne'e no tanba la-hetan apoiu adekuaudu hosi família no hosi sociedade rasik ne'ebé dalabarak marginaliza sira.

Kazu ne'e rejista iha tribunál ho Núc. 0399/12.PDBAU. Julgamentu leitura akordaun prezide hosi Dr. Hugo da Cruz Pui. Ministériu Públiku representa hosi Dr. Alfonso Lopez no arguidu hetan defeza hosi Defensor, Dr. Antonio Fernandes (estajiáriu).

Atu hetan tan informasaun, favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795